

漁

石

集

二



漁 石 集
(二)

唐 龍 集

漁石集卷二

序

國語序

六經而後國語猶近古焉。何也。詩有國風。以言乎列國之風也。匪徒言也。蓋善惡著則美刺興。美刺興則勸懲得。宣理以導民。設教以訓俗。紀政以表方。被之者油油然忘其入矣。夫國語所語者。皆八國當時行事。上儕于國風。世有升有降。道有醇有疵。義有大有小。文有盛有衰。莫之乎同也。至諸本善惡以成美刺。因美刺以昭勸懲者。其極則一而已。是故大者莫如周語。宣王。周之賢君也。王不藉千畝。虢文公諫之。弗聽。乃喪南國之師。伐魯立孝公。仲山甫諫之。弗聽。諸侯從是而不睦。苟不因雲漢之變。側身修行。則中興之績或慙焉。其次莫如齊語。桓公中主而已。親逆管仲于郊而與之坐問焉。于是乎定民興國。修法寄政。外攘諸夷。內屏周室。赫焉霸矣。是故拂諫者。雖賢君猶債事也。任賢者。雖中主猶強國也。斯可以訓矣。他語猶夫是也。尙謂不足竊附於國風乎。蓋風以風之。默乎語也。感人深矣。語以道之。暢乎風也。亦庶幾乎感人也。故曰六經而後國語猶近古焉。石以爲錯。不曰非玉不用也。藥以攻疾。不曰非五穀不食也。是故君子取之矣。侍御史雨山郭子自微。觀風於秦。克慎彝典。述修古訓。乃推其緒於是書。而布諸學官弟子。員。毋亦有風之之道哉。或曰。闡藝文。明史法。斯又不但已也。

小學集解序

新安朱子著小學六卷。以授童蒙。繹而解者非一人。厥旨攸當。國子祭酒和順王公應韶哀而集之。大義炳炳如指掌。榆次寇公子惇以御史中丞巡撫甘肅諸鎮。付是書于龍曰。其慎布諸學宮。龍序之曰。天下之政。同文則治。君子之學。合道則純。堯舜禹湯文武周公孔子之道。自軻之後。迄弗得其傳。散也久矣。幸而有宋周子程子。發微闡幽。蒐緝遺緒。至朱子斯蔚然而大成焉。蓋堯舜禹湯文武周公孔子之道。載諸六經四書。三氏者。乃羽翼乎經而於書乎是訓也。明興以來。咸尊信而誦習之。上無異教。道德一矣。下無異學。風俗同矣。迨於近儒。銜異者惡其用。挾奇者厭其常。崇虛者嗤其實。趨徑者鄙其純。乃膠膠於朱子之言。是病抗顏而攻之。若訟若讐。然曰。吾以明吾道乎爾。夫橫議興者。以誣世也。學禁張者。以病國也。寇公用是爲懼。乃惟配天之績。肇自岐嶷。作聖之功。啓于童蒙。是書立教以宏訓。明倫以敦典。敬身以善則。稽古以論世。徵言以畜德。考行以取善。所以固其德性而端尙其習者也。於是乎皇皇然。先之以正本焉。俾閭閻之下。童而習之。正是非之分。定取舍之極。庶幾白首猶弗悖乎其初矣。正猶詔夫適越者而南其轅與轍焉。尤建旆而導之。豈至中道泫然迷其岐乎。易曰。正其始。萬事理。然則公深於易之理者哉。

送徐子入覲序

徐子字用先。蜀之嘉州人也。正德中居御史臺。以論事編于田里。皇上卽位。用薦者召爲陝西按察司副使。明年。天下諸司入覲。陝乃吾徐子當行。羣后四朝。敷奏以言。明試以功。古之制也。陝昔稱四塞之國。天

下莫強焉。軹道褒谷。固自若也。名山大川之限。猶夫昔也。然形縮於中乾。制窮於末大。釁疑於轉噬。有識者不凜然寒心也哉。故夫材官不具。士馬耗逸。黠寇擁衆。前年三萬掠平涼。今年五萬寇涇州。明年後年。其何如也。故夫大郡旁鎮。分植諸藩。歲滋月息。城隘不足益其國。民窮不足增其賦。明年後年。又若何支也。故夫州縣之間。番種雜居。懸弓橫劍。以日竊於原野。抑豈能晏然不轉噬乎。斯三者。徐子慨於中久矣。藩籬之戎。不殄則入室。腹心之疾。不廖則裂膚。若記傳所謂峻中國之防。少諸侯之力。徙邊境之患者。班班然皆可行焉。徐子往矣。其惟建遠猷。畫明策。以敷奏于廷。俾盡制曲防之令。達權救弊之化。布諸國中。則三秦安。三秦安則天下安。不然。君子之憂猶未歇也。郇模獻字。鄭俠繪圖。皆能增益國家之利。徐子賢者也。其何難於此哉。

送兩山人觀序

金華奠於大江之東。山川沕鬱。風俗龐厚。易治宜莫先焉。邇來大夫君子。其政不忍猛而寬。而境內煦煦然。夫何吏狃於恩。朘剝忘倦。民狎於愛。吞併公行。可憂也已。嘉靖丙戌。安仁兩山張公文輔。以才御史。出補是郡。施德敷政。繩枉糾暴。慈惠刑罰。並宣其理。己丑春。天下諸司入覲。兩山當行道。經於淮。漁石子曰。惟昔之稱善治者。吏畏其威。民懷其德已矣。雖然未也。夫德常加於君子。威常行于小人。吏有不才者矣。獨無才者乎。民有善者矣。獨無不善者乎。不才者畏吾之威。而才者罔懷。是因威以廢德。善者懷吾之德。而不善者罔畏。是因德以弛威。德廢者苛。苛不足以勸吏。威弛者玩。玩不足以馭民。惟夫吏不才者畏其

威才者懷其德。民善者懷其德。不善者畏其威。則德以節威。威也。德亦威也。威以輔德。德也。威亦德也。斯之謂善治。是故克威克愛。允侯所以定功。不吐不茹。山甫所以賦政。豈非明徵也哉。書曰。明試以言。敷奏以功。車服以庸。古述職之道也。兩山之政。操張弛之宜。中剛柔之節。敷試于廷。豈特庸之以車服而已乎。陟明之典。弗克以違矣。

二忠錄序

昔元裔梁王。憑恃其險。而貳國之令。有滇未寧。皇祖不欲勤兵于遠。命吾婺忠文公。諭以順逆。俾納土不從。死之。繼以荆水忠節公往。亦死。既問罪之師至。乃克底定。忠文子紳。陟嶺而南。收遺殖。莽然墟矣。泣言于朝。贈諡進秩。恩有加。既守臣訪忠節公狀。疏以告。錫典如忠文。合祠於城之南。時其享祀。龍正德丙子。觀風茲土。弔二公之靈。而求其遺烈。弗得。恆皇皇然。或指曰。此有石可考。乃槩也。或指曰。此有墨可誦。縮而觀之。諡議之文。與二公抗顏對讐之言。暨凡哀而酹之之詞。諸紀列生沒之狀。蔚焉咸在。曰。殆全矣乎。實惟湮沒是懼。而況不敍殺身成仁之美者。君子譏之。乃託諸木傳焉。夫士以伏節死義爲難。卽有國者。罔克遽致之。漢四世而有中郎之節。唐載祀維百。杲卿罵賊而亡。皇祖開迹之始。方城之區。而以死徇者。乃駢首焉。是何喁之至而應之疾歟。夫捐軀者臣之分也。擇死者士之志也。粵自元裔踐中國。政失其綱。天下戚之。既聖人作。受天顯命。凡我士猶汙之得濯。劃然響赴而願委質焉。可以寢猾夏之謀。而復我冠裳。正我名分。秩我倫理。修明我典彝文物者。則力爭之。爭之不得。寧繼以死。勿恤。此二公之志也。分也。語

曰守死善道。君子非赴鑊挺刃之難。死而無以善道之患。徇悝傷勇。刺秦任俠。道祇病已。二公亮而執貞。而不汙分全而志不忒焉。善道矣哉。然物之弊者。有託乃傳。二公忠功義聞。不滅不蝕。有如日月在。雖無是集可也。然而俾萬世之下。讀者掩卷。彊於義而厲其忠。不奸度。不從欲。不犯非禮。則是集有相之道焉。其庸可略乎。

表忠錄序

唯是餘干康山忠臣廟。祀丁公普郎而下三十六人。唯是豫章城忠臣廟。祀趙公德勝而下十四人。城又有全大節忠節二祠。皆祀四人。孫公燧輩是已。夫三十六人十四人。實惟我太祖初定江西。僞漢湓至。各鼓譟夾大軍扼之。或戰。或擊。或圍。或拒。或守。或襲。或誘。或殿。或謀。或被執弗屈。駢首死於難。既僞漢平。皆錫爵列祀。血食茲土。夫四人乃宸濠劫共爲亂。或抗膺厲聲。叱冒僞命。或誓弗食。或憤懣皆死焉。居民閔然。各畫地爲祠以祀之。嗚呼。諸君子烈矣。賈子曰。烈士徇名。謬哉斯言。何其誣善也。名者虛器。不足以盡行也。名之盛。實之衰也。士誠務名。殆詭而生爾。烏能死。夫死之於人大矣。知死之分者。智也。守死者。信也。蹈刃赴鼎者。勇也。智則辨。辨則不惑。信則貞。貞則不貳。勇則果。果則不懼。不惑。不絕。不懼。而後能死焉。名何爲哉。然則諸君子殆盡智明信成勇。以徇乎道者。非徇名也。嗚呼。烈矣。烈矣。昔魯爲主守死。遂稱禮義之國。康山之陽。豫章之區。諸君子桓桓赳赳。若雷之厲。川之不息焉。尤可見我祖宗以禮義立國。而君子誠國之紀矣乎。夫三十六人十四人。祀秩已昭。先是嘗列四人狀以告於上。典且至矣。然遠者浸微。近者

僻壤罔皆聞焉。故錄其實。俾有司傳之。庶可以觀乎興乎。而全軀保妻子之臣。抑戚戚然掩卷而泣矣。發潛闡幽。興善止惡。春秋之法也。詩之教也。又御史之事也。責也。君子毋曰僭哉。

循吏私錄序

正德己卯。江西缺監司。予當行。是維孽王湛亂。虔劉斯民。燬其室廬。是維士馬彭彭。繹騷于途。征餽轉輸。興于野。乃民弊弊焉。日跼諸危亡。庶府之政。若焚網然。既至。實弗勝是懼。亟問於君子曰。吾聞政有經。今日之事。奚先。曰。民病哉。官邪昌哉。大者恤民隱。正吏習已矣。抑聞有序。二者奚先。曰。吏失職。則民失業。夫民猶羊。而吏爲之牧者也。古之牧良。故澤而肥。今之牧殘。隕然斃矣。奈之何不跳踉而號也。無亦正吏習是急哉。予曰。聞命矣。乃布檄以繩諸黷貨奸政者。弗悛。督責之。又弗悛。必斥勿貸。君子曰。性有善惡。習有上下。政有勸懲。故烹封舉者。彊國賞。罰明者。識治。子之政。毋乃詳於懲。而勸猶略乎。予曰。不明之過也。乃俾有司錄諸先爲吏循。而沒有遺愛者。于是乎廣信府錄同知曹琥。吉安府錄推官陳茂烈。建昌府錄推官羅江。于是乎泰和縣錄知縣陸震。安福縣錄知縣莊典。言其政。皆曰。介乎其廉。而節也。郁乎其惠。而和也。挺乎其直。而不回也。哲乎其明。而不闇也。秩乎其肅。而不替也。言諸其民。皆曰。始奠乎安。若堵乎。而今由由乎思之。若父母乎。予曰。美乎。碩乎。澤澤乎。吾幸而論其世焉。諸郡縣先是有祠。乃俾斲木爲主。增祀之。吾見吏而士者。憮然曰。均之民父母也。彼沒而歆民之祀。我顧生棄於民哉。庶幾賂不彰。與私欲不行。與培克不加。與刑鈞而賦儉。與作僞自遠。而奸慝無所容。與民于于然。隱口廖矣。卒不悟不勸者。不仁之

人民之殃也。天其天諸。夫錄止於五人。慎之也。抑以耳目之所睹記。而事易見。人易感也。況前乎此者。業載諸祠。後乎此者。未蓋棺焉。非故略也。附錄高壘。易春。乃登習有關焉。特錄劉源清。大忠義也。特錄夏尙朴。劉狝。貴士行也。夫忠義昭。士行興。然後吏習不媮。抑勸之大者乎。

鍾氏家譜序

鍾子告于唐子曰。室而弗構。隳厥基。治而弗裘。失厥制。皆君子之恥也。先是曾祖哀鍾氏之居澤州者。而爲譜。其例以世別名。以序別齒。以子系父。孫系子。凡生若卒。與冠婚。與殯葬。與家有善。鄉有行。官有政。罔不具錄。昭可考也。自曾祖而上。得四世焉。自曾祖而下。以及於予父。得三世焉。總七世而已。今自予父而下。以及於予。暨子若孫。又纍纍然數世矣。皆未之及也。世遠則湮。支繁則散。予是以懼。而將續之。抑有疑焉。譜著從祖。實異姓也。自外人爲予鍾之宜子。至考本姓。則不傳矣。乃予欲於續譜之外。而別附以譜。以明其微也。亦可乎。唐子曰。異姓無爲人後之義。禰絕者。小宗繼。同姓則然也。何也。姓也者。受之於王。而傳之於祖。相因相固。相聯相保。百世不可易也。祖非鍾姓。而子孫強而附焉。則宋可以爲姬。魯可以爲子乎。固非也。然其本姓。若之何。而不傳也。則可戚矣。雖然。孔子少孤。不知叔梁紇之葬於防也。問于鄒曼父之母。然後知之。安知一鄉不有鄒曼父之母乎。姑令多方以訊之。訊之不得。然後別爲附譜。以著其不得已之情。以宣其不敢忘之義。以明其不可淆之分。斯爲仁人君子之道也。夫豈惟譜哉。廟必異其祊也。祭必異其班也。庶幾可也。鍾子又問曰。善惡著。則勸懲昭。良史之法也。今善則書。惡則不書。毋乃猶有闕乎。予

欲並書之則何如。唐子曰：意則善矣，義則不可也。何也？事君有犯而無隱，事親有隱而無犯，道不同焉。家之有譜，非子紀父，則孫紀祖，非父者亦父之班也，非祖者亦祖之班也。其有過，口可得而言乎？手可得而書乎？諱之誠是也，卽子弟聖人亦曰爲隱焉爾。隱斯矜，矜斯弗棄之矣。故人樂有賢父兄也。禮曰：與仁同過，然後其仁可知也。得非此類也乎？鍾子再拜曰：類族辨氏，義之道也。彰善匿惡，仁之道也。義至則分正，仁盡則化厚，分正化厚而孝弟之德宏矣。又何加焉？乃書之而去。

隴西汪氏族譜序

汪子麟應孔捧其家譜以徵言於予。吁，遐矣哉！汪氏之爲宗也，當隋之季，迄無定主。其始祖華，奮自新安，聲義振旅，俘翦羣盜，保有睦嫠六州。旣李唐啓運，乃籍土地，稽首闕庭，進爵越國公。迨孫處惠，移鎮鞏昌，茅土不絕，是爲隴西汪氏。中傳于世顯者，仕金，領隴州防禦使。金亡三年，猶守郊保。及堅兵頓于城下，爰誓于衆曰：岌乎殆矣，爾民何罪？登陴哭三日，乃議撤備。夫始守三年，終哭三日，豈非以萬人之命則全乎，而死綏之志猶闕如也？是以怫然有憾焉。後封隴右王，沒諡義武。子若孫七公三王而尙主二，其諸被袍笏負印綬者，纍纍若若，不可勝計。又傳至于庸者，爲便道總師兼資善大夫。洪武初，王師赫臨，海宇底定，庸輸其款誠以附聲教，途獲世守。由是傳而義而福而壽而慶而釗而澄，以逮於麟，俱授節鉞，稱世家者莫能先焉。遐矣哉！汪氏之爲宗也，竊惟人之有宗，猶木之有本，水之有源也。木在山，其枝糾錯，端本則齊；水在地，其流廝分，溯源則合。一家之人，尊卑異服，大小異等，親疏異殺，遠近異分，邈乎不齊也。自夫宗法

一立則尊統卑。大輯小。戚聯疏。遠維近。昭穆以綸之。名物以紀之。恩義以固之。而家道修矣。雖然。觀天文者。則齊於歷象。察地理者。則辨於職方。闡宗法者。則考於譜牒。其極一而已。苟宗法雖舉。而譜牒猶稱闕焉。則逃易忘。久易迷。微易湮。蒙易晦。雅易瀆。啖易攜。旁易廢。末易散。終至于疾病不問。死喪不弔。富則棄貧。貴則遺賤。老則虐孤。少則抗長。漠然若塗之人者。世未嘗無也。先王惇族興仁之化。固如是乎。是故譜牒修則宗法明。宗法明則人倫厚。天之經。地之義。人之行。罔不然也。又何間焉。斯譜也。品式未周。而變例亦略。然克慎于宗法。而木本水源之德。則油油然不忘矣。于是乎君子曰。應孔知有孝弟之心也夫。

吏部獻納稿序

吏部獻納稿者。楊公邃庵先生吏部時所獻納者也。自高宗命傳說曰。朝夕納誨以輔台德。晏子進言於其君曰。君所謂可而有否焉。臣獻其否以成其可。君所謂否而有可焉。臣獻其可以去其否。于是乎有獻納之職矣。夫獻納有三。曰道。曰位。曰時。已矣。有道則善。有位則達。有時則諧。道存乎臣。位與時存乎國。不易之分也。傳說道與位與時皆至焉者也。是故阿衡一德。罔專厥美。孟軻氏道至矣。位與時不至。仁義之策。無以變齊梁之政。固也。陸贄道與位亦至。而無其時。炳炳數萬言。罔非暝眩之藥。然而忌者衆矣。先生正德中。爲吏部尙書。曰。君之休戚。惟我同之。國之安危。惟我係之。況掌邦治以佐王均邦國。尤周冢宰之制乎。而吾不容沈晦也明矣。於是辨論官材。澄汰流品。日若有弗及焉。其見於獻納者。則規視朝以匡闕政。勸經筵以緝聖學。理直臣以獎臺諫。原細過以全國體。繩僭賞以抑近習。疏方略以戢內盜。陳邊務以

消外虞。尤皇皇如也。至於災異表沴。身求策免。復力請親宗廟之禮。廣儲嗣之本。慎警蹕之防。遠騎射之戲。撤市肆之利。逐番域之僧。還邊鎮之卒。危言讜論。極其剴切。雖詩書之告其君者。殆無以過焉。夫先生之道。人臣之節也。位又古上卿焉。忌者嫉其忠。讒者間其直。言之而諧者固多。不諧者亦數數然。是固時而已矣。然早嘆千里。灌溉之益不可誣。中流汎濫。一壺尤有力焉。故齊梁之國。不至糜爛。孟子之功也。唐之奉天。不卽胥于亡。陸贄之功也。當是時。寇賊竊發。嬖倖盈朝。諫臣遠放。其殆矣。實幸先生惻誠孚於宸極。譽望尊於朝署。正顏抗膺。不震不懼。以匡翼乎其間。不然。吾懼天下之憂。抑又甚乎。孰謂時有不至者耶。夫乃言惟服。遽興商道。矢詩遂歌。亦隆周室。其時又何如哉。是故時而已矣。

正學書院志序

正學書院志者。志夫正學書院也。自魯齋許氏教授京兆。闡明橫渠之學。後之人緬想遐風。遙追明德。乃立書院以永厥傳。歲月徂久。裂爲民居。難於市肆。君子憫之。宏治中。邃庵先生以提學至。爰究爰度。乃移置焉。以道設科。分經建局。于是乎彬彬弟子員。復知有魯齋之學矣。上之知有橫渠與二程之學矣。又上之知有孔氏孟氏之學矣。此志之不可以已也。志公檄。明始也。建造考制也。先賢紀統也。學約崇要也。文若詩載藝也。人才興。明效顯矣。官氏班。學職修矣。書以貫道。以紀事。以崇獻。皆不可遺。故以書籍終焉。

送陽明先生還朝序

爲臣不易。固也。社稷之臣。尤不易哉。惟是寧邸宸濠。反道改度。罔克悔禍。羣醜嗾之。私畜強圉。繕器械。具

舟艦謀不利於社稷。正德丙子，中丞陽明先生領節鉞鎮虔州路。虔居江之上流，兵尤善鬪。先生乃蒐乘閱卒部，勒俟焉。己卯之六月十四日，濠戕殺守臣，浮江濟師，攻諸郡邑，以襲留都會。先生舟趣閩，濠遣巨筏邀之，距百里。先生聞變，亟馳吉州告于衆曰：「人臣出境，有以安社稷者，專之可也。」予茲往討賊，遂檄布濠之罪於四境，下令督諸郡縣徵兵以從。既吉州虔州袁州臨江諸路兵咸集，先生誓之曰：「日濠所荼毒非爾父兄，卽爾子弟，亟執爾讐而後朝食。」衆曰：「惟命。」七月十九日，克豫章城，擣濠巢穴。民稽首再拜曰：「非公濠復來，民胥死矣。」夫濠輕用礮公，濠逞不已，民胥亂矣。越六日，執濠于江，悉俘其黨。民稽首再拜曰：「非公濠復來，民胥死矣。」夫濠輕用礮人之軀，沈人之族，積威深矣。況擁衆數萬，憑恃江潮，故反之日，遠邇震恐。先生聲義致討，首嬰其鋒，止暴戢亂，保大定功，而克鎮撫其社稷。曰：「社稷之臣，先生其庶幾乎？」天子卽位，嘉乃丕績，璽書召還，將大畀以政。龍乃次其功，俾史氏采焉。龍不佞，敢有終告，以布厥衷。昔者商王召傅說，置諸其左右，命之曰：「朝夕納誨，以輔台德。」說復于王曰：「惟建事學于古訓，惟學遜志時敏。」王卒乃有獲，允懷茲道，一德之風，阿衡弗專美焉。先生明于聖人之學，克遵先王之教，茲固以良弼召乎。幸卒對揚休命，陳謨匡辟，明保天子，念終始典于學，以監成憲，以康兆民，以祈天永命，尤社稷之至計也。傳曰：「大臣者，以安社稷爲悅者也。」于先生終望之。

馬政志序

陝西阻守三邊，撻伐諸虜，張蹶之武，不如騰槽之利；曲踊之衆，不如超乘之捷，甚矣哉。馬政不可不講也。

厥初散茶懸令招易有質。畫壤除苑。孳牧有場。分寺置卿。點視有正。揆序協則。典守備官。十乘啓戎。三駟敵愾。胥於是乎出焉。夫木槁而蠱生。防缺而流靡。法玩而弊滋。私販廣則招易廢。場利侵則孳牧寡。周歷怠則點視疏。是故茶弛其禁。苑逸其丁。馬耗其額。軍墮其實。噫。弊矣。成化間。乃設憲臣以司察之。布法宣典。用正諸枉。未之有改也。嘉靖癸未。侍御史陳子學扶命而至。本于忠勤。紀以張之。儒以賁之。周防盡制。功用蔚興。且逖蒐舊章。旁纂遺緒。牘而爲志。以觀久遠。苑卿郭子孟威。式崇修復之令。乃刊而布之。慨自方冊既設。紀載斯具。其來遠矣。奈之何去其籍者。則數數然乎。是故夏禮無證。周制不存。古昔有遺憾焉。而況于今耶。斯志行。則測本以求端。舉要以崇實。申禁以防末。鈎法以補弊。廣效以興利。咸秩秩然有在矣。猶曰政之不舉。而廢墮是憂。豈其然乎。吾聞收圖籍者。忠益則深。條便宜者。總理尤密。夫志猶夫是也。執事者盍慎鑒焉。

鹽政志序

侍御史朱子廷立作鹽政志。龍讀之。憮然嘆曰。天下之政。未有不緣乎利者也。天下之弊。未有不緣乎利者也。蓋利廣斯嗜。嗜斯競。競斯赴。赴斯視。視斯偷。偷斯奸。由是弊若蠅毛。纍纍然叢而集矣。孰知夫利之可節而不可偷也。孰知夫利之可正而不可奸也。我朝酌古定制。京師調度。與諸邊供億。胥給於民賦。懼其傷也。又興鹽筴以佐之。因天地之產。以充國家之需。借商人之贏。以補百姓之乏。法亦若是已矣。厥初散斂之方。準乎盈縮。豐約之節。隨乎登耗。以法制利。不以利奸。法。國紓其用。商操其奇。民資其食。未始不善也。

夫何法令既斁。奸利日滋。于是乎有竊販者矣。弊在齊民。于是乎有占中者矣。弊乃在勢要。于是乎有鬻窩者矣。則俛然而濡其迹者。又非但齊民而已也。勢要而已也。是故始引鹽米二斗有奇。而後則五倍之。而猶未已。始惟商中之。而後則貴人巨室私據焉。始商爭赴懼不先。而後則耗而轉徙。始額盈課羨。而後則徵逋欠。利以滋弊。弊以戕政。司國計者竊憂之。嘉靖己丑春三月。朱子奉天子命。清理兩淮鹽政。其至也。崇彝憲肅明軌。力修釐革之效。自警有九誠。修法有五事。戢奸有十五要。訓商有九令。皆可述也。尤督學官弟子員之才者。自夫出產。與建立。與制詔。與疏議。與評論。與鹽官禁約。逃蒐博綜。舉綱分目。而志成焉。上下數千餘年。炳若指掌。豈惟昭古今之制哉。周官具法度。斯彰坊記作民欲以止。夫有志。則諸所奸利者。咸曰。法昭昭若斯乎。犯之者殃。觸之者亡。吾見其凜然而不敢也。憂末流者。務修其防。以救之。緝度以正利。正利以蠲弊。蠲弊以興政。志胥有在。防峙而末流可遏矣。是可爲紱。

督府奏議序

督府者何。乃三邊釋騷。軍旅荐興。詔起太傅遂庵先生提督其事也。奏議者何。先生所爲諸疏。以攘戢乎外。而畢其經營者也。彪列而刻之以傳于世者。誰氏。固原提兵副使澤山桑子溥是已。曷爲刻之。將以告夫邊疆之臣。介冑之士也。曷爲告之。蓋敵情巨測。技之剽利。及諸出沒之候。虛實之形。與在我調度之方。制馭之術。分擊合圍之法。出備入保之宜。無不在焉。是故邊疆之臣。介冑之士。不可以不知也。抑諸山川之險易。斥堠之疏密。主將之仁暴。士伍之奮弛。錢穀之盈縮。聲援之遠近。亦皆昭可考已。尤不可以不知。

也。昔賢論陸贄書爲已試之方。此亦已試之方。而得其精神。可以折衝者也。得其方略。可以壯猷者也。何也。醫始切脈。數年之後。則但觀色聽聲已矣。是故見癥稱神。折肱稱良。無他。習其理然也。先生始巡茶馬。再爲總制。出入于邊者三十餘年于斯。其誠習之者乎。謂之曰已試。固不誣也。則豈惟邊疆之臣。介冑之士。當知之哉。刻之是也。其諸列薦之條。又曷爲並存之。蓋薦賢者。忠之則也。得士者。昌之本也。是故舉親舉讐。舉偏。日汲汲然。非祁大夫乎。西土之士。擢用不遺。非漢諸葛氏乎。是獨可以後諸邪。夫不敏亦猥及焉。乃可略也。

贈司馬荆山先生提督三邊軍務序

比歲北敵擁衆數萬。控弦鳴鏑。侵犯亭障。陝西諸邊。是用弗靖。累用薦者。起司馬荆山先生。卽其家授鉞焉。而式遄其行。龍慕先生蓋有年矣。比至承顏接詞。拔見惓誠。若鬱鬱然而有遁思者。未及問。先生語之曰。予杜門不出五年于斯。被裘啜菽。巖居而川游。甚自得也。旣王言載臨。北面稽首。奉疏謝曰。臣愚不足以辱命。不可再謝。曰。臣毫不足以辱命。又不可無已。乃建旆而西。雖然。老夫終遁焉爾。子以爲何如。龍曰。消息盈虛。順時之則。進退存亡。守理之極。是故困斯尺蠖焉。不遇斯龍蛇焉。乃若藏器于身也。得政于國也。獲譽于時也。螭伸龍變。感會奮庸。理之固然。又何讓焉。挾出疆之贄者。存皇皇之心。抱振世之鐸者。形栖栖之迹。此非大彰明較著者哉。先生風采足以折衝。謀猷足以經國。斯其藏器也久矣。璽書優分。闡之責。金幣申三錫之命。斯其得政也專矣。臺臣舉忠。廷議推賢。斯其獲譽也公矣。旰食之懷。不可虛也。多壘

之辱不可忘也。亦惟勉於斯行。抑聞藏器者利其用。是故不有方叔元老克壯其猷者乎。得政者任其憂。是故不有王命召虎王心則寧者乎。獲譽者愜其公。是故不有申伯之德聞於四國者乎。人待先生不在二三君子之後也。先生自待尤不在二三君子之後也。道以時庸。業以機張。日幸夫振策以宣文武之則。靖冠以紓西北之憂。定功以副中外之望。罔不在斯行矣。而豈徒哉。先生曰。善哉言乎。於老夫宏矣。盍著之于篇。吾將圖焉。

督府奏議序

自古邊患莫如陝西。天下之兵亦莫疆于陝西。近年邊患如故。兵乃弊弊然而入于弱矣。先是龍以督學至其地。周游歷睹。竊有憂之。嘉靖元年二年。敵真踰涇州。殺人若雨。流血若川。鴟鵂過而惻焉。開府擁帳堅壁。不遣一騎。怨詛交集。若罔聞。是又大可嘆已。四年冬。司馬荆山王公秉鉞以臨。龍曰。願公振策靖寇。定功以克壯於猷。公和色愛之。而熟籌之。而亟施之。六年。敵擁衆數千。長兵弓矢。短兵刀鎗。逐水草而嬉焉。公建旗伐鼓。指揮將士。正奇迭出。攻守並用。犄角誘伏。變化無常。始出延綏。則延綏擊其首。繼掠靈武。則靈武衝其腹。終入甘涼。則甘涼斷其尾。衆大挫衄。扶創而西走。俘虜不可勝計。三路捷奏。璽書褒異。進公秩於宮保。尋參贊留都機務。旆則南矣。龍方督漕江淮而迓公舟。公出諸奏議于牘曰。子第觀之。龍曰。邊疆之事。大者舉賢選將。足食足兵。議則先之。次者信於賞罰。申嚴號令。議無或後。次者聳斥堠。謹烽謨。布遊擊。又無不備也。振策靖寇。定功以克壯于猷。胥于是在。夫謀豫立者則事成。計先定者則策舉。是故